

FURÚMIÑETU LIGÁRADAN PÁBLO LUN TIMOTÉO

Labúrüjan Páblo lun Timotéo

1 ¹Áu Páblo, láni Jesucrístu apóstolu áu, nouñajóun láu lugúmadin Búngiu le Wasálbaragüle lúma Wabúreme Jesucrístu, le uágubei weménigida lun webélurun siélun. ²Nabúrüjañoun gárada to bun, Timotéo, niraú le tímatimaati lídan wafíñen luágu Jesucrístu. Resíbibeí abíniruni, gudémejabu lúma darángilaü lúmagiñe Wáguchi Búngiu lúma lúmagiñe Jesucrístu le Wabúreme.

Ewéridijani lueí arúfudajani le maríchabei

³Queí meja nayúmuragun bun dán meja le nídinbei Macedónia, reídeimemebá ubúругu Éfeso lun baríñagun joun ítaga gürígia lun marúfudajan jamá cátei le maríchabei, ⁴meténi jagíame lún buri úraga le magúmuhaditi jawágu jenébaanfaangu binádu mútu. Cátei buri le, barúrügüti sigénei le málati, ani míderagun lumútiña gürígia lun jesériwiduni Búngiu láu jaffíñerun luágu.

⁵Le lúnbei barúfudajani joun affíñetiña jagía, lun jínsiñegua jamá jámagua lugúndun jarúmaaru tan janígi, míchujali jarítangun dúru jawágu, áni buídujali jaffíñerun. ⁶Añájein, adíreirutiña lueí buri cátei le, ába jíchaagun jóungua lídoun buri sigénei málati. ⁷Buséntiña buri lun arúfudajatiña jamá lídan lúruudu le líchugubei Búngiu lun Moisés, úati gunfaráanda jamáni ni le guánarügü jaríñagubei ni le jarúfudajabei luágu lúruudu ligía láu sarágu afíñeni.

⁸Subúdi wamúti luágu buídu lan lúruudu, yúsuwarúgaali ligía quei lubúdubu. ⁹Lúnti lasúbudirúniwa luágu máma lan joun ja adúgübalin le buídubei ladügüwa lúruudu, lúruudu jóunti ja wuríbabaña, ja magáambadibaña, ja mebéresenbaña láu Búngiu, ja gafígounbaña, ja minébenbei Búngiu lúma cátei lánina Búngiu joun, ja áfaruti jáguchi o jáguchu jilágubei, joun sun ja gáfarajadibaña, ¹⁰joun ja agámaridubaña mamárieidunga o ja agámaridubaña wügüriña jáledigu, joun ja íwerujabaña gürígia, joun ja yéebaña, jáma ja áfíñurubaña luágu

iyéeni. Joúnti gíñe sun ja adúgübaña ámu cátei múaradunti láu arúfudajani jarúmati. ¹¹Arúfudajani jarúmati le, úarati láu ugánu buíti luáguti asálbaruni le loúnajabadina Búngiu, le weírigubei, le fuleísei láalibei gürígia, apúrichija.

Eteíngiruni luágu lugúdemejabu Búngiu

¹²Teínqui numúti Wabúreme Jesucrístu, le íchugubei ubáfu nun lun wadágimanu le, luágu lanúgünina queísi ában wügüri derégüdaguati, lúma luágu líchugunina lun nesériwidun lun. ¹³Adúga láali sun cátei lé buri nun láu sún meja anábagua náni, eíbaaja numútiña meja ja afálarubalin, adúga numúti meja sun le nuáraati lun nagúmuchaguagüdüni jafñen. Ába gudéme nan lun Búngiu lugúndun mámagidina meja afñeti luágu Jesucrístu áni ibídiñetí meja nun ca lan nadúgübei. ¹⁴Ligia luweírinbei nasándiruni labínirunina Búngiu, úara lúma afñeni lúma ínsiñejabuni le gíñe wawágubei luágu lídaañadiwa lan ában lúma Jesucrístu.

¹⁵Inárüni cátei le, le tímatimaati, áni lúnti jafñerun súngubei luágu inárüni lan. luágu “líabin lan Jesucrístu ubouágun lun lasálbaruniña gafígountiña”, áu furúmiñeti jádaangiñe. ¹⁶Ligia nagúdemedunbei lun Búngiu lun gayáraabei lan larúfuduni Crístu sun lugúraasun nuágu, áu le furúmiñebei jádan gafígountiña. Ítara líña niábin lun ábanbadina lan jémpulu joun ja lúnbaña jafñerun luágu, lun jabíjini ibágari magúmuchaditi. ¹⁷¡Ligia rúwama lubeí uweíriguni lúma inébesei lun Búngiu le Warúeitebei lun sun dan, súnwandan, le mouwedadibei, siñá ligia larijñiwa, le Búngiu le ábanrügüti, le sábiu! Ítaralá.

¹⁸Timotéo, niraú, rúnumuti gumádi le bun lun bageíndaguni luwúribun Búngiu buídu, queí meja lariñaguni Búngiu jayúmulugugiñe wadújeñu lueígiñe Jesucrístu bun, ragúñubei inárüni lánina asálbaruni, adúgeina le basúbudirubei luágu richá lan. ¹⁹Añájein gürígia, féridi jamúti jafñen ladúga madúgün jamá gásu láu le jasúbudirubei luágu richá lan. ²⁰Ítara líña lasúseredun lun Himenéo lúma Alejandro ja nedéregerubaña lun Máfia lun jafúnrendeirun lun manábagun jamáni Búngiu.

Arúfudajani libúgürü ayúmuraguni lun Búngiu

2 ¹Furúmiñeti cátei, amúriajatina lun ladúgüniwa ayúmuraguni lun Búngiu jawágu sun gürígia. ²Lúnti wayúmuragun jawágu gumádimatiña, lúma jawágu sun lúrudugu lun gayára lan wabágaridun ában ibágari darángilati, le derégewati lun Búngiu, le gíñe inébewati lídan sun luwúyeri. ³Buíti cátei le, gúndaati gíñe Búngiu le Wasálbaragüle láu, ⁴le busénbei lun jasálbarun sun gürígia, lun gíñe jayábin lun jasúbudiruni inárüni lánina wasálbarun. ⁵Ában rügüñein Búngiu, ában rügüñein gíñe gayára ladímurejan waweígiñe ligíbugiñe Búngiu, wügüri le Jesucrístubei. ⁶Deréguati Jesucrístu lúngua lun loúnwen lun lafáyeiruni lebégi jasálbarun sun gürígia, ában lasúbudirawagüdüni cátei le lídan lidáani. ⁷Lun

cátei le, loúnajana Búngiu lun narúfudajan joun ja mámabaña jurú libúgürü inárüni le, lun gayára lan jafñerun luágu Crístu queísi Jasálbaragüile. Áu, queísi ában affñeti luágu Crístu, inárüni naríñagubei, mayéejatina.

⁸Ligía nabúseerúnbei lun jayúmuragun wügüríña lídan sun fulásu, iñúrañu jájabu láu tarúman anígi, úouga igáñi ni asígenejani jádan jáma jíbiri gürígia lídan le jayúmuragun lun Búngiu. ⁹Manárimelá tuwéndegun jadáuragun würíña, lun máma lan láu amúriguni janárimeguti jaráanseragua jóungua, ni láu gólu, périlas, o daúguauí séruburitu, ¹⁰lun láu lan lubuídun igáburi jadáuragua jóungua quei lúnti lan jadúgün würíña ja derégeguañabaña jóungua lun Búngiu. ¹¹Lúnti maní jamá würíña dan le larúfudajóuniwa joun, lúnti jerésibiruni arúfudajani ligía láu ában únabuni. ¹²Májatina lun tarúfudajan wúri lídan jadámurin affñetiña, ni lun tagúmadiruni wúri wügúri, lúnti teréderun maníña. ¹³Lugúndun Adán ladúgübei Búngiu furúmiñe, lárigiñe, ladúgoun Éva. ¹⁴Máma gíñe Adán leyéedubei Máfia, wúri ayeedúaboun, áni láu tayeedúniwa, ába táburujan lídoun figoú. ¹⁵Láu sun líra, jasálbaruba würíña láu jagúnfulirun láu le lúnbei jagúnfuliruni queísi úguchuru, ánjein ítara méme jafñerun luágu Crístu, arúfuda jagía ísiñejabuni lúma arúmani láu igáburi buíti.

Ligáburi ída lúba lan jóuserun fádirigu

3 ¹Inárüni cátei le. Ánjein abúseera ában gürígia lun fádiribi lan, ában wadágimanu buíti labúseerúbei ladúgün. ²Lun fádiribi lan ában gürígia, lúnti labágaridun ában ibágari le míchuti lúgaaru lun ladeinjóuniwa lun. Lúnti túmari lan ábanrügi wúri, lúnti gíñe lanúgün ában ibágari sériuti, buíti lichúgü, inébewa. Lúnti aráanseñu lan sun dan lun lerésibirun bisída lúbiñe, lúnti buídu lan larúfudajan, ³moún lumuti gátadi lan, manígi wuríbu, mabúseerun ligíame seínsu le marúmaanti lagáñeirúniwa. Lubáragiñe líra, lúnti areída lan, díli ligíame, manígi ligíame seínsu. ⁴Lúnti gayára láníña tílana lúban agúmadira buídu, lun gíñe ladúgün lun gagáambadi jamá lirájüñü, inébejabu. ⁵Lugúndun ánjein magúmadirun lubáliña wügúri tílana lúban, ¿ída lubági gayára lan laríjin jáu tílana lilígilisín Búngiu? ⁶Moún lumuti lubeíti fádiri lan ában iséri affñeruti lueí lanáangun lúngua sarágu luágu lubára, ábame láburujan lábugiñoun íñarawaguni le gádaanbalín Máfia. ⁷Lúnti buídu lan ligáburi, lúnti gíñe inébe lan joun ja maffñebaña lueí ladímurejóun wuríba luágu, ábame láburujan tídoun lisádarán Máfia lun lagúnrinchawagúniwa lubuídun líri.

Ligáburi ída lúba lan jóuserun ja esériwidubaña ligílisirugu

⁸Ja gíñe esériwidubaña ligílisirugu lúnti wügüríña jamá ja inébewatiña, lúnti jagúnfulirun láu jerérun, moún lumuti jabácharuadun, ni lun línsiñedun seínsu joun. ⁹Lúnti járúgüdüni inárüni lánina afíñeni le arúfuda láalibei Búngiu woun, buídu, lun gíñe jarúma tan janígi. ¹⁰Lúnti jouchún, lárigiñeme, ánjein úa lubeí mégeiti luágu lubuídun jagáburi,

ligíaba gayára lan jesériwidun ligílsirugu. ¹¹ Würíña ja esériwidubaña ligílsirugu, lúnti gíñe inébewa jamá, moún lumuti marásualugu jamá, lúnti sériu jamá, derégüda lídan sun cátei. ¹² Ában esériwiduti ligílsirugu, lúnti túmari lan ábanrügü wúri, lúnti gíñe lagúmadiruniña lirájüñü buídu jáu sun tílana lúban. ¹³ Lugúndun esériwidutiña ligílsirugu ja adúgübalin jawádigimari buídu, buídubei ladímurejoúniwa jawágu, áni ragútimaatiña anígi lun jadímurejan luágu jafíñen luágu Jesucrístu.

¹⁴ Agúrabatina nídin aríjabu madíse, ¹⁵ nabúrújaní buri cátei le bun lun ánjana lan adárasaragua, lun subúdi báni ída líña lan lun loúserun gürígia jádan lufámilian Búngiu, to lilígilisinboun Búngiu le wínwanbei lun sun dan. Lilígilisin Búngiu ágüdajabalin linárün, toúnigiteí inárüni ligía buídu. ¹⁶ Siñátí lasígengerúniwa luágu weírigu lan Wasálbaragüle Jesucrístu, le subúdigüda láalibei woun.

Arúfudaguati Búngiu lúngua queísi gürígia lídan Jesucrístu,
arúfudaleí Sífiri Sándu luágu úaragua lan Jesucrístu.

Aríja jameí ánjeligu.

Apúrichijoúati luágu joun lílana sun fulásu,
afíñewa luágu lídan sun fulásu,
resíbiwa ligía siélu.

Ja lúnbaña jígiruni jafíñen

4 ¹ Furáanguti laríñaguni Sífiri Sándu luágu lídoun lánme lagúmujoún dan, añájeinbaña lan gürígia ígiruti jafíñen luágu Crístu, jafálarame espíritugu ja ayéejatiña lúma arúfudajani le jámagiñeti máfianu.

² Jagáambajaba arúfudajani jámagiñe gürígia biángua tigíbu, yéetiña, ja masándirunbaña ni cáta tídan janígi camá jamuga churáwaaru láu ában gürábu súti. ³ Gürígia jagía, aríñagatiña luágu mabuídun lan lun jagámaridun gürígia, aríñaga jagía luágu níjein lan eíginí moún lumuti leigín, láu sun ladúga lan Búngiu eíginí buri ligía lun jeígini ja afíñebaña jáma ja subúdibalin inárüni, láu atéíngiruni lun Búngiu luágu. ⁴ Sun cátei le ladúgübei Búngiu buíti, moún lumuti wamájarun lun ni cáta lídaangiñe, lúnti wánjarun lun sun le adúga láalibei, teínqui wameíme luágu. ⁵ Lugúndun láu wamúriaajan lúma Búngiu lun labíniruni sun weígin, ñúbinti lun labuídurun láu lerérün, lúma láu wayúmuragun lun luágu.

Ában esériwiduti buíti lun Jesucrístu

⁶ Ánjein barúfudaja cátei le joun wadújeñu lueígiñe Jesucrístu, ábanbadibu esériwiduti buíti lun Jesucrístu, áni tágüdajoúba buwáni láu buri dimúrei le lánina wafíñen, lúma arúfudajani buíti le falábaalfbei. ⁷ Meféridirabeí bidáani asígeneja luágu buri libídiegun úraga le ni cátati ligíbugiñe Búngiu, lubáragiñe líra, áfaaguabá lun bagúnfulirun lúma Búngiu. ⁸ Láu sun ju lan lánjingichún úgubu, jútimaati bánjingichagun búngua lídan bagúnfulirun lúma Búngiu,

lugúndun barúti cátei buíti woun lídan ibágari le lúma lídan ibágari le lúnbei wabíjini. ⁹Inárúni cátei le, áni lúnti jafíñerun súnigubei luágu. ¹⁰Ligía lébubei wawádigimaridun, sífuri wagía anabúni, lugúndun rúwamaali lan wemenigi luágu Búngiu le wínwanbei, le aráansejaalibei asálbaruni joun sun gürígia, áni ja afíñebaña luágu, jerésibirubei asálbaruni ligía.

¹¹Ligía buri cátei lúnbei barúfudajani lun jagúnfulirun gürígia láu. ¹²Sériulá bigáburi lun manügúniwa ban quei ni cáta lueígiñe núraügídibu lan, lubáragiñe líra, lúnti ában ban jémpulu buíti joun ja afíñebaña, lídan ligáburi badímurejan lúma bouserun, lídan ínsiñejabuni, lídan bafíñen luágu Búngiu, lúma lídan larúma bibágari. ¹³Rúguabá búngua lun balíjanun Lerérun Búngiu lun adámurini, íchiga gurásu joun wadújeñu lídan jafálaruni, arúfudaja joun daríme lun nachúlürün. ¹⁴Yúsubei ubáfu le íchugubei Búngiu bun dán meja le jíchugunbalin tábutigu liglísi jájabu bábulugu, adímurejeina jagía dimúrei lúmagiñe Búngiu bun.

¹⁵Derégeguabá búngua lún buri cátei le, lun gayára lan larijíniwa bawáanserun lídan cátei lání Búngiu. ¹⁶Goúniguabá búngua, lúma láu le barúfudajabei, ítaramemebá derégüdagu lídan sun cátei. Ánjein badúga ítara, basálbaruba, sálba jagíame gíñe ja agáambubalibu.

Ída lúba lan ligáburi louserun Timotéo jáma afíñetiña

5 ¹Madeínjabá lun ában weírei mútu, lubáragiñe líra, adímurejabá lun camá jamuga lun búguchi, ousera bñame wügúriña núbürigiña queísi bamúlenu. ²Ousera bñña weíyaaña würiña quei bouserunun búguchu, ousera bñame würiña irájüñü quei bítunu, láu lubuídun arítaguni.

³Íderagua bñña würiña ja jiláañabaña úmari, ja arijúabei luágu mégei jamá iderúni. ⁴Ánjein garájüñü tubeí ában würi to jiláali túmari, gabáña tugúya, lúnti jafúnrendeirun irájüñü jagía lun jeténirun furúmiñe lun le jemegeirubei jafámilian lúma lun jáguyugüdüni ínsiñejabuni le jadúweirubei joun jagúbürigu, lugúndun buíti cátei le, gúndaati gíñe Búngiu láu. ⁵Würi to jiláali túmari, to eréderuboun tábugua le tímatimaati, rútumuti teménigi luágu Búngiu, merédeti gíñe tayúmuragun lun Búngiu áriebe, wéyuagu. ⁶Ánjounti to edéregereguboun túngua lun ugúndani lánina ubou le, jiláñu tíña lun cátei lánina Búngiu láu sun wínwangiru lan. ⁷Aríñagabei buri gíñe cátei le joun, úa lámuga ni cáta lun ladeinjoún joun luágu. ⁸Le marítagunti jawágu lánigu, játima lidújeñu, magúnfulinjalí lúma lafíñen, wuríbatimáatiti sügü láu ában gürígia le mafíñeti.

⁹Lun labürüdúniwa tíri würi to jiláalibei túmari tídan gárada lánina íderawagúni, to rügúboun níjeinjalí lúmagiñe úrüwa-wein irúmu táu, lun gíñe ábanrügügili lán meja túmari. ¹⁰Lúnti tasúbudirúniwa luágu buíti le tadúgübei queí buri jamúga ánjein meja agúriaja tubáliña tirájüñü buídu, ánjein buídu lubeí touserun jáma ja achúlürübaña túbiñe, ánjein seríwi tubáliña idújeñu lueígiñe Crístu manáangunga túngua, ánjein íderagua tubáliña ja asúfurirubaña, o ánjein adúga tubeí furúmieguarügü ámu cátei buíti.

¹¹ Würíña ja jiláaña úmari ja ñúbürigiña, mabürüdabeí jíri tídan gárada, lugúndun lachúllürüba dan lúnya jabúseerun jámari. Ábameti jígiruni jesériwidun lun Búngiu liglísirugu lúnya jamárieidun. ¹²Ábameti jadímurejan gürígia jawágu ladúga jadúraaguni jadáradun lúma Búngiu le lánina jesériwidun lúnrügi súnwandan. ¹³Aba jayábin lun jamágualigudun, mámarügü jamágualigudun, ába gíñe marásualugu jamá, eméteja lídoun sun cátei, adímureja cátei le moún lumuti. ¹⁴Ligía nabúseerúnbei lun jamárieidunya ja ñúbürigiñabaña, lun garájüñü jamá, lun joúnigirunun jában, lun míchugun jamá lúgaaru joun ja maffñebaña lun jadímurejan wuríba jawágu. ¹⁵Añájein würíña, ígira jamáli Búngiu, ába jafálaruni Máfia.

¹⁶Ánjein añájein jabeí würíña ja jiláalibei jámari jádan lufámilian ában affñeti würi o wügüri, lúnti líderaguniña, mígirun ligíame lun ában jamá ijúrtügu tun liglísi, ítara lúba gayára lan jíderaguniña tílana liglísi würíña ja busénbaña jíderawagún.

¹⁷Fádirigu ja lábugiñeñounboun jaríaajan liglísi, ja adügübalin jawádigimari buídu, lúnti inébewa jamá sarágu, játima gaffsiutebalin apúrichijani lúma arúfudajani. ¹⁸Taríñajare Lerérun Búngiu. “Magúragua jumeí liyúma jilügün bágasu le lánina wadágimanu lueí lásiñerun leígin lídaangiñe tubúñe fulúwaaru le uágubei ladügüragua lun lagídaruni túra.” Aríñagatu gíñe. “Garíchatí ñadágimeinti lun libjín lafáyeiruaja.”

¹⁹Madúgabá gásu luágu líchugún lidúnrun ában fádiri ánjein úa jabeí biáma o úrüwa lun jíchugun fe luágu lidúnrun. ²⁰Ánjaña ja asfígirubaña lídan figoú, lúnti badeñjan joun jagíbugiñe sun affñetiña lun janúfudedun súnqubei lueí jaffigounjan. ²¹Ayúmuraguatina bun ligíbugiñe Búngiu lúma Wabúreme Jesucrístu, lúma jagíbugiñe ánjeligu ja lanúadirubaña, lun bagúnfulirun lúma buri gumádi le, lun ában lan láu janügüniwa sun gürígia. ²²Míchigabádúgabá gásu luágu líchugún lidúnrun ában fádiri ánjein úa jabeí biáma o úrüwa lun jíchugun fe luágu lidá ni ában queísi fádiri tídan liglísi lídan loufudagun, lúnti batúriajani ligáburi buídu lueídügü gaffigoun lan, larijfwameti camá gúndaatibu láu lifigoun. Dísebá lueí sun le wuríbabei.

²³Quei súnwandan lan gári lan burágeirugu, mátabá dúnarügü, gurába gíñe murúsun diweín.

²⁴Lídan le báluajaniña wügüriña lun jesériwiduni Búngiu liglísirugu, jarítaguabá luágu añájein lan gürígia arijúati jaffigoun furáangu lubáragiñe jagúserun, añájein gíñe, marijñinti jaffigoun darí lárigiñe. ²⁵Ítara méme líña gíñe, cátei buíti le jadügübei gürígia, arijúati furáangu, áni íbini marijín lan, siñáti leréderun arámudagu lun sun dan.

6 ¹Affñetiña ja músubaña, lúnti weíri lan jinében jayúbudirigu joun, lun madímurejoún lan wuríba luágu líri Búngiu, ni luágu cátei le warúfudajabei. ²Ánjein añájein lubeí esériwidutiña gayúbudiritiña affñetiña, moún lumuti lougua lan jinében joun ladúgarügü jadújeñu jamá lueígiñe Crístu. Lubáragiñe líra, lúnti jesériwiduniña buídutima,

lugúndun ja erésibirubalin lubuúidun jesériwidun, afñetiña, idújeñu gíñe jínsiñegutiña. Arúfudajabei cátei le, apúrichijabeíme.

Arúfudajani maríchatí lúma irisini inárüni

³Ánjein arúfudaja ában gürígia cátei maríchatí áni múaraanti lúma larúma arúfudajani le lání Wabúreme Jesucrístu le íderagubaliwa agúñfulira lúma Búngiu, ⁴ában barúgua túngua gürígia ligía, le ibídiñeti ni cáta lun. Ganígiti lasígenejan luágu buri dimúrei, lídaangiñeti asígenejani le liábin buri gimúgaü, gáñiguaü, anábajani, mafíñeni joun gürígia, ⁵lúma buri wuríbu magúmuchaditi. Jíbiri gürígia ja, wuríbati jasáminan, ibídiñejabutiña lun inárüni, jarítaguatiña luágu lébuna lan lagáñeirun irisini agúñfuliruni lúma Búngiu. Disebá jaweí gürígia ja ítarabaña. ⁶Inárüni luágu ában lan oúnwenbun irisini agúñfuliruni lúma Búngiu lun le gufúrumabei láu le lúmabei. ⁷Manúgüntiwa ni cáta wámagua ñájoun ubouágun, siñábei gíñe wanúgün ni cáta yágiñe, ⁸ánjein geígin wabei, ganáangun, lúnti gufúruma wamá láu líra. ⁹Ánjaña ja busénbaña jarísidun, mawándun jamúti ouchwagúni, ába jáburujan tídoun lisádaraana sarágu lagúbüri ayúmajani le málati, le ásiñeragüdübei gürígia jebélurun siélun, ába jóúdin máfiougatin. ¹⁰Línsiñegu seínsu ligía lílagülebei sun luwúyeri wuríbani, áni añájein sarágu gürígia ladúga jóuchun jabíjin seínsu, ába jígiruni jaffñen luágu Crístu, buíngüda jamáaliti jabágari guánarügü láu asúfuriruni.

Wuríbu buíti le lání afíñeni

¹¹Ánjabuti amúrü, Timotéo, queísi ában ban wügüri derégeñuti lun Búngiu, anúrajabá lueí buri cátei le. Barúba ában ibágari le lánina ísuruni, le lánina gúñfuli lúma Búngiu, le lánina afíñeni, le lánina ínsiñeni, le lánina gagúraasuni lúma areíduni. ¹²Áfaaguabá buídu luágu lání wafíñen fuleísei, ábame bagáñeiruni ibágari le magúmuchaditi, lun líra lagúara Búngiu bun dán meja le barúfudunbalin jagíbugiñe sarágu gürígia luágu aráanseñu bíña lan lun bafálaruni Crístu. ¹³Guetó, ligíbugiñe Búngiu le íchugubei ibágari lun sun cátei, lúma ligíbugiñe Jesucrístu, lé meja gíñe geféenbei luágu le inárünibei ligíbugiñe Piláto, ¹⁴buséntina lun bídin láu le nubeíbei bun táu sun tarúma banígi, úa lámuga cába lan uágu ladeinjoúa bun, darí liábin Wabúreme Jesucrístu. ¹⁵Dánme lachúlürün dan ligía, le lanúadajabei Búngiu, lagíribuduba Crístu ubouágun, Búngiu rügúñein weírigu, Súnti Gabáfu, Jarúeite urúeigu, Jabúreme abúremeinigu. ¹⁶Ligía rügúñein mouwedadi, le abágaridubei lídan larúgouna le ñíjin lubeí mayarafadun lan ni ában. Maríjin lágili ni ában gürígia Búngiu, siñáti gíñe larijíniwa. ¡Rúalá uweírighuni lun, arúfudualá lubáfu lun sun dan! Ítaralá.

¹⁷Ja gámabaña irisini lánina ubou le, aríñagabá joun lun manáangun jamá jóungua luágu, míchugun jameíme jeménigi luágu irisini ligía, lugúndun machoúrunti, lun jíchuguni jeménigi luágu Búngiu, le

wínwanbei, áni rúleí sun cátei woun gíbe lun wagúndaarun luágu.

¹⁸Aríñagabá joun lun jadúgüini le buídubei, lun buídu lan jóuserun le tímatimaati, lun aráanseñu jamá lun jíchuguni lúma lun jafánreinruni le jámabei. ¹⁹Ítara lúba jóúndaragun irisini jóúngua siélu le adúrarubei lun sun dan, ítara lúba jabíjini ibágari tímatimaati le magúmuchaditi.

Lagúmujoún dimúrei lun Timotéo tídan gárada to

²⁰Timotéo, toúnigibeí le íchugúbei lábugiñe baríaaajan. Magáambabá dimúrei buri le lánina lisúbudin uboú, ni sigénei le lánina cátei le gíridügübei subúdi,

²¹añájein jádaangiñe ja afálarubalin luwúyeri subúdi le, ígira jamáali jafíñen.

Biní lábu Búngiu. Ítaralá.